



ХАЛЫҚАРАЛЫҚ ТУРКОЛОГИЯ КОНГРЕСІ

(ҚАЗІРП ЗАМАНЫ ТУРКОЛОГИЯ: ҒЫЛЫМЫ ПАРАДІГМАЛАРЫ ЖӘНЕ ПІНАРАЛЫҚ СИЛАПЫ)

МАТЕРИАЛДАРЫНЫҢ ЖИНАФЫ

17-20 ҚАЗАН 2023

ТҮРКІСТАН/ҚАЗАҚСТАН

X. ULUSLARARASI TÜRKOLOJİ KONGRESİ

(MODERN TÜRKOLOJİ TEMEL PARADİGMALAR VE DISİPLİNLERARASILIK)

BİLDİRİ KİTABI

17-20 EKİM 2023

ТҮРКІСТАН/ҚАЗАҚСТАН

ТҮРКІСТАН/ҚАЗАҚСТАН
X. ULUSLARARASI TÜRKOLOJİ KONGRESİ
BİLDİRİ KİTABI

TÜRK VE MISIR MİTOLOJİLERİNDE KADIN ARKETİPİ ÜZERİNE MUKAYESELİ BİR İNCELEME / Doç. Dr. Turgay KABAK -----	1317
BEDEN FOLKLORU: DADALOĞLU'NDA KADIN / Doç. Dr. Tuğba AKKOYUN -----	1329
BA'RÛ HANI GRAFİTİLERİNİN TÜRK KAYA RESİMLERİYLE BAĞLANTILARI ÜZERİNE BİR DEĞERLENDİRME / Dr. Başaran Doğu GÖKTÜRK -----	1351
O'ZBEK TİLİNİ XORİJJİ TİL SİFATIDA O'QITISHDA AUTENTİK MATERİALLARDAN FOYDALANISH / Prof. Dr. Gulshan ASILOVA-----	1371
"MEDİNE'DE MUHAMMED TÜRKİSTAN'DA HOCA AHMET" ÖZDEYİŞİ HAKKINDA ANALİTİK BİR İNCELEME / Prof. Dr. Metin YILMAZ	1385
MUHTAR AVEZOV'UN HİMAYESİZİN GÜNÜ HİKÂYESİ'NDEKİ KADIN SORUNLARI VE ANLATIM TEKNİĞİ / Dr. Nassiba JUNAYEVA.....	1399
YUMAŞIK OĞLU MAVLEKEY'İN XIX. YÜZYILIN İKİNCİ YARISINDA KAZAK TÜRKLERİNDEN DERLEDİĞİ <i>DÎVÂNE</i> ŞEHİ BÜRKİ DESTANI / Dr. Madina MOLDASHEVA.....	1411
KONGRE KURULLARI VE PROGRAM -----	1422

O'ZBEK TILINI XORIJIY TIL SIFATIDA O'QITISHDA AUTENTIK MATERIALLARDAN FOYDALANISH

USE OF AUTHENTIC MATERIALS IN TEACHING UZBEK AS A FOREIGN LANGUAGE

Gulshan ASILOVA*

ANNOTATSIYA

O'zbek tilini o'rganishga qiziqish dunyoda yildan yilga ortib bormoqda. Jahonda keng tarqalgan tillardan farqli o'laroq, o'zbek tilini xorijiy til sifatida o'qitish metodikasi hali boy tajribaga ega emas. Boshqa til vakillariga o'zbek tilini o'qitish jarayoni va undagi muammolar tadqiqotchilar tomonidan hali yaxshi o'rganilmagan soha hisoblanadi. O'zbek tilidan xorijliklar uchun shu kunga qadar yaratilgan o'quv adabiyotlari ham yetarli deb bo'lmaydi. Xususan, o'zbek tilini ingliz, nemis, xitoy, koreys, rus zabonli o'rganuvchilarga o'qitish tajribasi natijasida yuzaga kelgan bir nechta o'quv qo'llanmalar va elektron majmualar mavjud. Biroq ularda berilgan o'quv materiallari jonli tilga qay darajada yaqinligi va ularning o'zbek tilida nutq o'stirishdagi samaradorligi o'rganilmagan. Xorijiy tillarni o'qitish metodikasining dolzarb masalalaridan biri ta'lilda autentik materiallardan foydalanish bilan bog'liq muammodir. Bu borada dunyoda keng tarqalgan tillarning metodikasida boy tajriba to'plangan. Ushbu soha mutaxassislarini asosan autentik materiallarni to'g'ri tanlash va ularni ta'lim jarayonida samarali qo'llash masalasi o'yantiradi. Maqola o'zbek tilini xorijiy til sifatida o'qitishda autentik matnlarni topish va ta'lim jarayonida ulardan maqsadli foydalanish masalalariga bag'ishlangan.

Kalit so'zlar: xorijiy til, o'zbek tili, nutq o'stirish, autentik material, autentik matn, lingvomamlakshunoslik

ABSTRACT

From year to year interest in learning the Uzbek language is growing in the world. Unlike languages widely spoken in the world, the methodology of teaching Uzbek as a foreign language does not yet have rich experience. The process of teaching Uzbek to speakers of other languages and the problems arising in the process are considered an area not yet well studied by researchers. Educational literature on the Uzbek language created so far for foreigners cannot be considered sufficient as well. Particularly, there are several study guides and electronic complexes that have been created as a result of the experience of teaching Uzbek to English, German, Chinese, Korean, Russian-speaking learners. However, to what extent the teaching materials given in them are close to the living language and their effectiveness in developing speaking skills in the Uzbek language has not been studied properly. One of the actual problems in the methodology of teaching foreign languages is the problem associated with the use of authentic materials in the process of education. In this regard, experience has been accumulated from the methodologies of languages that are widely spoken across the world. Experts in this field are mainly concerned with the correct choice of authentic materials and their

*pedagogika fanlari doktori (DSc), professor, Alisher Navoiy nomidagi Toshkent davlat o'zbek tili va adabiyoti, Toshkent, O'zbekiston (gulshanasilova@gmail.com)
<https://orcid.org/0000-0002-8462-7120>

effective application in the educational process. The article is dedicated to the issues of finding authentic texts in teaching Uzbek as a foreign language and their targeted use in the process of education.

Keywords: foreign language, the Uzbek language, development of speaking skills, authentic material, authentic text, linguistic and regional studies

KIRISH

Xorijiy tillarni o‘qitish metodikasida matn tilni o‘rganishning muhim birligi bo‘lib hisoblanadi. Matn orqali til o‘rganuvchi o‘zga madaniyatni qabul qilishga yordam beradigan bilimlarni oladi, o‘rganilayotgan til mamlakatining geografik, siyosiy, iqtisodiy, ijtimoiy tuzilishi haqida ma’lumotlarga ega bo‘ladi. Bu esa lingvomamlakatshunoslik kompetensiyasini shakllantirishda muhim o‘rin tutadi. Ushbu kompetentsiya shaxsning o‘zga til madaniyatiga kirishib ketishini ta’minlashga xizmat qiladi. Lingvomamlakatshunoslik kompetensiyasi deb “tili o‘rganilayotgan mamlakatning milliy an’analari, urf-odatlari, realiyalarini bilish, til birliklaridan til egalari oladigan mamlakatshunoslikka oid axborotni ola bilish hamda undan to‘laqonli muloqotga erishishda foydalanish”ga aytildi (Азимов, Щукин, 2009, s. 128). Shuningdek, lingvomamlakatshunoslik kompetensiyasi shaxsda tanqidiy fikrlashni rivojlantirish, tolerantlikni tarbiyalash, uni tili o‘rganilayotgan mamlakatining axloqiy-madaniy me’yorlaridan xabardor qilishga ko‘maklashadi.

Mamlakatshunoslikka oid ma’lumotlardan til ta’limida foydalanishning muhimligi yana shundaki, u xorijiy tilni o‘rganishga motivatsiyani kuchaytiradi, bu esa jonli til muhitini bo‘lmagan sharoitda juda zarur. O‘zbek tilida “lingvomamlakatshunoslik” tushunchasi asosan xorijiy tillarni o‘qitish metodikasiga bag‘ishlangan adabiyotlarda uchraydi. Xususan, ularda “lingvoo‘lkashunoslik” (Agzamova, 2015, s.120] va “mamlakatshunoslik” (Sadiqov, 2021, s. 6) terminlarining qo‘llanganini ko‘rish mumkin. O‘zbek tilini o‘rgatishga mo‘ljallangan qo‘llanmalarda o‘zbek xalqining tarixi, milliyligi, urf-odatlari, an’analari aks etsa-da, lingvomamlakatshunoslik nuqtayi nazaridan tadqiqotlar olib borilmagan.

Xorijiy til mashg‘ulotlarida lingvomamlakatshunoslik kompetensiyasini shakllantirishda shu til egalari madaniyatiga xos bo‘lgan asl hayotiy vaziyatlarni yaratish, ya’ni muloqot muammolariga doir materialni tanlash, haqiqiqiy muloqot modelini tuzish tamoyili muhim o‘rin tutadi. Aksariyat o‘quv adabiyotlarida ushbu tilni yangi til sifatida o‘rganayotganlarga mo‘ljallangan matnlar beriladi. Ammo

metodika rivojlanishi va til o‘qitish tajribasi ortishi bilan xorijiy tildagi jonli muloqotga tayyorlashda bunday matnlarning qay darajada foydali ekanligi bahs-munozaralarga sabab bo‘la boshladi. Darslik yoki o‘quv qo‘llanmalar mualliflari tomonidan tilni bilishning muayyan darajasiga mo‘ljallab tuzilgan o‘quv matnlarini o‘zlashtirish real muloqot vaziyatida qanchalik yordam beradi, degan savol metodistlarni o‘ylantiradi. Shu bois xorijiy tillar ta’limida real muloqotdan olingan autentik materiallarni topib, ulardan mashg‘ulotlarda foydalanish metodlari keng qo‘llanmoqda.

ASOSIY QISM

O‘zbek tilini xorijiy til sifatida o‘qitish sohasida, garchi autentik materiallar uchrab tursa-da, ularning tanlanishida tasodifiylik ko‘proq. Xususan, autentik materiallar bilan ishslash usullari alohida ishlab chiqilmagan. Shu bois o‘zbek tilini o‘qitish metodikasida “autentik material”, “autentik matn” tushunchalari termin sifatida qo‘llanmagan.

“Autentik” so‘zi qadimgi yunon tilidan (authentikos) “asl, haqiqiy” degan ma’noni anglatadi (Азимов & Щукин, 2009, s. 25). Ruscha-o‘zbekcha lug‘atning 1983-yildagi nashrida “auténtичный” so‘zining tarjimasi “asliga to‘g‘ri, asl nusxaga mos, muvofiq; asl nusxa bilan bir xil, teng, haqiqiy” deb berilgan (Русча-ўзбекча лугат 1983, I: s. 43). Keyingi yillarda nashr qilingan lug‘atlarda esa bu so‘z berilmagan (Ўзбекча-русча ва русча-ўзбекча лугат, 2008). Shu bois ingliz tilida “authentic”, turk tilida “otantik”, qozoq tilida “шынайы”, tojik tilida “аслӣ” deb yuritiladigan bu tushunchani biz dunyoning ko‘p tillaridagi kabi “autentik” deb atashni ma’qul ko‘rdik.

Til ta’limida “autentik” tushunchasi til va nutq materialining real hayotda nutqiy muloqotni amalga oshirishni ta’minlaydigan xususiyatini anglatadi. Biroq xorijiy til ta’limining zamonaviy metodikalarida mashg‘ulotlarda til o‘rganuvchilarga mo‘ljallangan, metodistlar tomonidan maxsus yaratilgan yoki qayta ishlangan materiallar va matnlardan foydalanish mumkin deb hisoblanadi. Taniqli metodist olim J. Harmer til o‘rganuvchilar o‘zlashtira oladigan autentik materiallarni topish ta’limning muhim vazifasi ekanligini ta’kidlaydi. Agar buning imkonи bo‘lmasa, turli qismlardan yig‘ilgan materiallardan ko‘ra moslashtirilgan (adaptatsiya qilingan) materiallarni qo‘llagan ma’qul deb hisoblaydi (Harmer 1998, s. 81).

Autentik material, u xoh matn bo‘lsin, xoh videomaterial yoki audiomaterial bo‘lsin, tilni o‘rgatish maqsadida yaratilgan bo‘lmaydi. Shu bois autentik matn deganda til egalari uchun yozilgan va ta’limiy maqsadlarga qaratilmagan matn tushuniladi. Bugungi kunda xorijiy

tillarni o‘qitishda autentik materiallardan foydalanish samarali, biroq metodik tajriba talab qilinadigan usul hisoblanadi. Ma’lumki, til o‘rganuvchilarning tilni bilish darajasi qanchalik past bo‘lsa, autentik materialni mashg‘ulotlarga kiritish va nutqiy vaziyat yaratish shunchalik murakkab kechadi. Lekin faqat noautentik, ya’ni “sun‘iy” matnlardan foydalanish ham o‘rganuvchilarni til muhitidan uzoqlashtiradi, bunday matnlar yordamida real muloqot vaziyatini yaratish ehtimoli juda past. Noautentik matnlar boshqachasiga “moslashtirilgan” materiallar deyilib, aksariyat hollarda ular yordamida o‘qib tushunish, tinglab tushunish, yozish va gapishtirish ko‘nikmalar ustida ishlash jarayonida til o‘rganuvchiga kerak bo‘lmagan, real, jonli tilda qo‘llanmaydigan mavzular, leksik birliklarni o‘zlashtirish talab qilinadi. Ularning ham til ta’limida o‘z o‘rnii bor. Demak, tilni o‘rganishda autentik matnlar bilan bir qatorda noautentik matnlar ham ta’lim maqsadiga qarab qo‘llanishi kerak. Biroq ularning barchasi til o‘rganuvchilarning nutqiy kompetensiyasiga mos ravishda tanlangan bo‘lishi, ularga o‘rganiyatgan tilning tushunarli va sodda tuzilgan modellarini og‘zaki va yozma ravishda yetkazib berishi muhim.

Amaliy lingvistika va til ta’limi sohasida taniqli olim G. Uidovson fanga “haqiqiy material” va “pedagogik jihatdan haqiqiy material” tushunchalarini kiritgan hamda ular orasidagi farqni ko‘rsatib bergan. Uning fikriga ko‘ra, til egalari uchun yaratilgan va hech qanday o‘zgartirishlar kiritilmagan materiallar haqiqiy, asl materiallar hisoblanadi. Pedagogik haqiqiy materiallar esa, tilni xorijiy til sifatida o‘rganayotganlar uchun mo‘ljallangan, shu bois mashg‘ulotlarda foydalanish uchun kundalik, aniq ehtiyojlarga moslashtirilgan bo‘ladi. Uidovson mashg‘ulotda foydalaniladigan materiallarni tanlashda ularni tushunish va o‘zlashtirish osonroq bo‘lishi uchun bir qancha shartlarga amal qilgan holda soddalashtirish zarur deb hisoblaydi. Ushbu material asl, haqiqiyga o‘xshagan va real manbalardan olingan bo‘lishi kerak (Widdowson, 1990, s. 67).

“Autentik material” tushunchasining ma’nosi keng bo‘lib, bu termin turli manbalardan olingan materiallarni anglatadi. Shu bois autentik materiallarni tasniflash masalasi metodikada muhim ahamiyatga ega. Rossiyalik tadqiqotchilar A.V. Perunova va M.V. Perunov autentik materiallarni quyidagicha tasniflaydilar:

1. Autentik audiovizual materiallar (telelavhalar, reportajlar, hujjatli filmlar, reklama).

2. Autentik ko‘rgazmali materiallar (slaydlar, fotosuratlar, kartinalar, yo‘l belgilari, jurnallardagi rasmlar, otkritkalar, rasmli kitoblar).

3. Autentik bosma materiallar (gazeta maqlolari, ommabop materiallar, qo‘sish matnlari, restoran va kafedagi menu, sayyoohlar uchun axborot broshuralari, xarid cheklari, yo‘l chiptalari, teatr, kino, konsert chiptalari, vizitkalar, komikslar, jamoat transportining reys jadvallari va b.).

4. Realiyalar (tangalar va valyuta, devor soatlari, telefonlar, qo‘g‘irchoqlar, marionetkalar va b.). Ulardan ta’lim jarayonida asosan ko‘rgazmali vosita sifatida yoki rolli vaziyatlarda foydalaniladi (Перунова & Перунов, 2017, URL-2).

Bunday tasnif metodistlarga autentik materiallarni tanlash va ulardan ta’lim jarayonida maqsadli hamda samarali foydalanishda yordam berib kelmoqda. Ushbu materiallarda til realiyalarining alohida o‘rni bor. S. Vlaxov va S. Florin ta’rifiga ko‘ra, “realiyalar – bir xalqning hayoti (turmushi, madaniyati, ijtimoiy va tarixiy taraqqiyoti)ga xos va boshqa xalqlarga yot bo‘lgan obyektlarni ataydigan so‘zlar (so‘z birikmalari)” (Влахов & Флорин, 2009, s. 55). Autentik materiallarni realiyalarsiz tasavvur qilish qiyin. Shu bois lingvomamlakatshunoslik yondashuvida asl, haqiqiy manbalarni tanlab qo‘llash muhim ahamiyatga ega.

K.S. Krichevskaya autentik materiallar sirasiga badiiy, tasviriy, musiqiy asarlarning aslini, shuningdek, atrofimizda uchraydigan buyumlarni ham kiritadi. Bundan tashqari, kundalik hayotda har kuni ko‘zimiz tushadigan e’lonlar, peshtaxtalar, xarid cheklari va shu kabilarni alohida guruhga ajratib, ularni pragmatik materiallar deb ataydi. Bu guruhga audio va audiovizual materiallar (radio e’lonlar va eshittirishlar, teleko‘rsatuvlar) ham kiradi. Pragmatik materialarning bu guruhi zamonaviy til namunalarini aks ettingani bois ta’lim jarayonida foydali hisoblanadi (Кричевская, 1996, s. 14).

Autentik materiallarning yana bir ahamiyatli jihat shundaki, ularda tilda sodir bo‘layotgan o‘zgarishlar aks etadi. O‘qituvchi ham, til o‘rganuvchilar ham har bir yangilikdan boxabar bo‘ladilar. Shuningdek, autentik materialning muayyan qismini, agar ta’lim maqsadlari har xil bo‘lsa, turli vaziyatlarda qo‘llash mumkin, bu ularning universalligi bilan izohlanadi. Kitoblar, maqlolalar, gazetalar turli matnlar va til uslublarini o‘z ichiga oladi, darslikdagi o‘quv materiallarda bunday xususiyatlar kam bo‘ladi.

Xorijiy mamlakatlarda o‘zbek tili darsliklariga ehtiyojning ortishi bilan o‘zbek tili ta’limida lingvomamlakatshunoslik yondashuviga murojaat qilish dolzARB masalaga aylandi. Chet elliKLar uchun yaratilgan o‘zbek tilini o‘rgatuvchi qo‘llanmalarning ayrimlarida bu yondashuv mavjudligini kuzatish mumkin. Xususan, N. Azimovaning “O‘zbek tili. Birinchi bosqich” kitobida audio va videomateriallар bilan ishslash uchun topshiriqlar berilgan [Azimova 2010]. Qo‘llanma A1 daraja uchun tuzilgan va 16 ta mavzudan iborat. Har bir mashg‘ulotning tarkibiga “Asl o‘zbekcha (Uzbek Realia)” rukni kiritilgan. Ushbu rukn ostida autentik videolavhalar ilova qilingan. Videolavhalar, filmlardan parchalarni ko‘rib, autentik audioyozuvlarni eshitib, ularga doir topshiriqlarni bajarish qo‘llanmada ko‘zda tutilgan. Masalan:

- 1) videolavhani ko‘rib, berilgan satrlarni to‘ldiring;
- 2) audioyozuvda eshitgan so‘zlariningizni berilgan so‘zlar ichidan topib belgilang;
- 3) sizga kelgan elektron xatni o‘qib, unga javob yozing;
- 4) ko‘rgan filmingiz qahramonlarining surati bilan ularga berilgan ta’riflarni taqqoslang va b.

Shuningdek, kitobda autentik rasmlardan ham keng foydalanilgan. Mazkur qo‘llanma o‘zbek tilini xorijliklarga o‘rgatish sohasida bugungi kungacha yaratilgan o‘quv adabiyotlari ichida metodik jihatdan eng samaralisi bo‘lib, ingliz zabon til o‘rganuvchilar orasida ommalashgan. U ingliz tili darsliklarining andozasi bo‘yicha tuzilgan va nutqiy faoliyatning barcha zarur turlari bilan ishslash imkonini beradi.

Autentik til materiallарini tanlashda o‘zbek tilidagi videolavhalar va filmlar boy manba bo‘lib xizmat qiladi. Boshqa turdagи autentik materiallardan filmlarning afzalligi shundaki, ularda tugallangan sujet mavjud bo‘ladi, bu sujet tomoshabinni faol bo‘lishga undaydi. Bunday manbaning til o‘rganishdagi ahamiyati yuqori bo‘lsa-da, filmlarning lug‘at boyligini oshirish hamda mustahkamlashdagi ta’sirini o‘rganishga bag‘ishlangan tadqiqotlar juda kam. Bu borada filmlarda subtitrlarning berilishi ham muhim ahamiyatga ega. Xususan, subtitrlarning qaysi turlari til o‘rganishda samaraliroq, degan savol metodistlar uchun dolzARB bo‘lib qolmoqda.

Yuqorida turlari keltirib o‘tilgan autentik materiallarning asosiy qismini matnlar tashkil qiladi. Autentik matnlarni tasniflashdan avval autentik bo‘limgan, ya’ni an’anaviy metodikada qo‘llanib kelgan o‘quv matnlariiga to‘xtalish joiz. Noautentik matnlar deb tilni xorijiy til sifatida o‘rganayotganlar uchun maxsus yozilgan matnlarga aytildi. Ular o‘quv jarayoniga u yoki bu grammatik mavzuni, leksik materialni mustahkamlash uchun kiritiladi. Yuqorida aytganimizdeklar,

metodistlarni autentik bo‘lmagan materiallar, ayniqsa ular jonli tildan uzoq bo‘lsa, til o‘rganuvchilarning nutqiy ko‘nikmalarini rivojlantirishda samara beradimi, degan savol o‘ylantiradi. Bir tomondan, tilni o‘rgatishda autentik materiallar, ya’ni haqiqiy manbalardan olingan va o‘quv maqsadlariga mo‘ljallanmagan materiallardan foydalanish afzaldek tuyuladi. Boshqa jihatdan, bunday materiallarning samarasi pastligi shunda ko‘rinadiki, ularning lingistik shakli juda murakkab bo‘lib, ta’limning aniq vazifalari va shartlariga har doim ham javob bermaydi. Xorijiy tadqiqotlarda autentik matnlarning quyidagi guruhalrini uchratish mumkin:

- yarim autentik matnlar (semi-authentic texts), ya’ni asl manbara asoslangan, lekin leksik va sintaktik jihatdan ta’lim dasturiga moslashtirilgan matnlar;
- qisman tahrirlangan autentik matnlar (roughly-tuned authentic texts), ya’ni grammatik materialning darajasi til o‘rganuvchilarning darajasidan birmuncha yuqoriyoq bo‘lgan matnlar;
- autentik sifatlarga ega bo‘lgan matnlar (authentic-looking texts);
- o‘quv-autentik matnlar (learner authentic texts) (Little, Devitt & Singleton 1988, s. 15).

Yuqorida nomlari aytib o‘tilgan matnlarning oxirgi guruhi tadqiqotchilar e’tiborini ko‘proq tortadi. Metodikada o‘quv-autentik (autentik elementlari bor va matabda xorijiy tilni o‘qitishga mo‘ljallangan) matnlar ko‘p qo‘llanadi. Ularga o‘quvchilarning til bilish darajasini aniqlash maqsadida autentik matnlardan foydalangan holda moslashtirib tuzilgan matnlarni misol qilish mumkin. Bunday matnlarni mazmun jihatiga ko‘ra Y.V. Nosonovich va R.P. Milrud 7 xil bo‘limga ajratganlar:

- 1) *kulturologik matnlar* o‘zga madaniyat xususiyatlari, ushbu madaniyat va til egalarining urf-odatlari hamda turmush tarziga xos jihatlar haqida tasavvur hosil qiladi;
- 2) *axborot matnlari* til o‘rganuvchilarning qiziqishlari va yosh xususiyatlariiga mos axborotni yetkazib beradi;
- 3) *vaziyatli matnlar* til o‘rganuvchilarga o‘quv ko‘rgazmasi sifatida taqdim etiladigan vaziyatning tabiiyligi hamda uni muhokama qilishni taqozo qiladi;
- 4) *milliy mentalitetga xos matnlar* o‘rganilayotgan tildagi u yoki bu jumlalar, nutq birliklarining suhabatda va muloqotda o‘rinli yoki o‘rinsiz qo‘llanganini tushuntirishga xizmat qiladi;
- 5) *tez tushuniladigan (reaktiv) o‘quv matnlarini* ishlab chiqishda ularning til o‘rganuvchilarda xuddi shunday autentik nutq, fikrlash va

hissiy reaksiyani vujudga keltirish xususiyatini hisobga olish talab qilinadi;

6) *autentik shakldagi matnlar* – til o‘rganuvchilarning e’tiborini tortish va matnning kommunikativ vazifasini hamda voqelikka aloqadorligini anglashni osonlashtirish uchun xizmat qiladi;

7) *autentik o‘quv topshiriqlari* matnga oid topshiriqlar bo‘lib, ular til o‘rganuvchilarning matn bilan o‘zaro aloqasini ta’minlashga xizmat qiladi. Bundan tashqari, topshiriqlar o‘quv vaziyatidan tashqarida sodir bo‘ladigan manbalar bilan ishlashga asoslangan bo‘lishi kerak (Носонович & Мильруд, 1999, s. 20).

Ko‘rinadiki, autentiklik xususiyati bunday matnlarning turli o‘quv maqsadlari va vazifalarini birlashtirib turadi. Demak, xorijiy til ta’limida ushbu tushuncha autentiklikka xos bo‘lgan shartlar va turlar yig‘indisini anglatadi. Bunda o‘quv mashg‘ulotining qismlari va ayrim jihatlari – matn, o‘quv topshirig‘i, o‘quv aloqalari va o‘quv sharoiti autentik matnni noautentik matndan ajratishga yordam beradigan muayyan mezonlarga javob berishi kerak.

G.I. Voronina tomonidan autentik matnlarning ikki bo‘limga ajratilishi metodik jihatdan e’tiborga loyiq. Birinchi bo‘limga tadqiqotchi muayyan vazifani bajaradigan matnlar, masalan, yo‘l ko‘rsatkichlari, belgilari, afishalar, sxemalar, diagrammalar, reklama prospektlari va boshqalarni kiritgan. Ular yo‘riqnomasi berish va tushuntirish vazifasini bajaradi hamda ta’limda samarali hisoblanadi. Bunday matnlarni tadqiqotchi til realiyalari sirasiga kiritadi va ta’lim jarayonining mustaqil elementi sifatida ular til o‘rganuvchilarni til egalari bilan nutqiy aloqaga kirishishga undaydi, deb ta’kidlaydi. Ikkinci bo‘limga muallif axborot matnlari, xususan, yangiliklar, maqolalar, intervylar, so‘rovnomalar, e’lonlar, izohlar, reportajlar va shu kabilarni kiritgan. Ularda, odatda, muntazam ravishda yangilanib turadigan ma’lumotlar va madaniy sohaga oid faktlar aks etadi. Bunday turdagи matnlar maishiy muloqot uchun zarur til birliklarini o‘z ichiga oladi (Воронина, 1999, s. 24).

Yuqorida autentik matnlarning mazmuni, shakli va noautentik matnlardan farqli jihatlarini ko‘rib chiqdik. Ularning yana qaysi o‘ziga xos belgilari mavjud?

Autentik matnlarning leksikasi e’tiborni tortadi: ularda olmoshlar, yuklamalar, hissiy bo‘yoqdir so‘zlar, modal so‘zlar, frazeologik iboralar, ayni zamonda tilda urf bo‘lgan so‘zlar ko‘p qo‘llanadi. Bunday matnlarning sintaksisi ham o‘zgacha: ularga qisqa va yig‘iq gaplar, tuzilishi jihatidan sintaktik bog‘langan gaplar xos. Shuningdek,

autentik matnlarda to‘liqsiz gaplar yoki tugallanmagan gaplar ko‘p uchraydi, ularda asosan sodda gaplar qo‘llanadi.

Matndan til ta’limida autentik material sifatida foydalanish uchun uning qanday ko‘rinishda berilganligi, ya’ni dizayni muhim o‘rin tutadi. Masalan, zamonaviy darsliklarda e’lon devorga yopishtirilgan varaq shaklida, maqola esa gazetadan kesib olingan parcha ko‘rinishida tasvirlanadi. Bu esa matnlarning tuzilishi, mazmuni va taqdim etish shakli til o‘rganuvchining qiziqishini oshirishi, mashg‘ulot davomida til muhitiga kirishga ma’lum darajada sharoit yaratishidan dalolat beradi.

Autentik matnlar qaysi manbalardan olinadi? O‘zbek tilini xorijliklarga o‘qitish uchun o‘quv kontentini yaratishda autentik materiallarni asl manbadan, masalan, yangiliklar dasturlari, tele-, radioreklamalar va ko‘chalardagi reklama e’lonlari, telefon orqali yuboriladigan xabarlar, do‘konlar va bozorlarning peshtaxtalaridagi ma’lumotlar, ijtimoiy tarmoqlardagi postlar, podkastlar yoki videoplatformalar kabi ko‘plab manbalardan olish mumkin. O‘qituvchi topshiriqlar yoki loyihalarni autentik materiallar asosida, o‘quvchilarining til bilish darajasiga qarab ishlab chiqishi maqsadga muvofiq. Shuningdek, o‘zbek tilini o‘qitish jarayonida autentik matnlar sifatida badiiy asarlar, badiiy filmlar, ommaviy axborot vositalari materiallaridan foydalanish ham samara beradi. Ular o‘zbek tilidagi autentik matnlarning asosiy komponenti va manbasi bo‘lib xizmat qiladi.

Bugungi kunda adabiy matnlarga yangicha qarash – ularni o‘zbek tilidagi lingvomamlakatshunoslikka oid ma’lumotlarni aks ettiruvchi hamda o‘zbek tilini o‘rganish va fikrini shu tilda ifodalashga xohishni kuchaytiruvchi vosita sifatida qo‘llash zamonaviy metodik tamoyillardan biri bo‘lib bormoqda. Buning e’tiborli jihat shundaki, nafaqat o‘zbek tilida yaratilgan asarlar, balki boshqa tillardan o‘zbek tiliga mohirona tarjima qilingan manbalar ham autentik material bo‘lishi mumkin. Sababi – badiiy uslubga xos bo‘lgan tasviriy vositalar, iboralar, maqollar sifatlari tarjimada “o‘zbekchalahtirilgan” bo‘ladi. Shu bilan birga, badiiy asarlar va ulardan olingan parchalarda til darsliklarida berilmaydigan mavzular uchrashini ham ta’kidlash joiz. Masalan, odatda xorijiy tillarni o‘qitishda boshlang‘ich darajadan boshlab oila, o‘qish, kun tartibi, sevimli mashg‘ulotlar kabi mavzularda maxsus tuzilgan matnlar bilan ishslash ko‘zda tutiladi. Badiiy asarlar esa ko‘plab keng muhokama qilinadigan mavzularni aks ettiradi. Bundan tashqari, adabiy matnlar amaliy topshiriqlarni tuzish uchun lingistik axborot manbayi bo‘lib xizmat qiladi hamda til o‘rganuvchilar uchun

barcha zarur ko'nikmalar – gapisht, tinglab tushunish, o'qib tushunish va yozishni rivojlantirishga ko'maklashadi. Demak, adabiy matnlardan grammatik tuzilmalar va yangi leksika manbayi sifatida foydalanish mumkin. Autentik matnlar sirasiga nafaqat badiiy asarlar va ulardan olingan parchalarni, balki uslub va janr jihatidan butkul farqlanadigan ilmiy-ommabop, publisistik, she'riy, axborot matnlarini kiritish jahon tillarini o'qitish tajribasida ko'pdan buyon qo'llanib kelmoqda.

O'qituvchi ta'lif jarayonida samarali natijalarga erishish uchun matnlarni tanlashda ularning qanday xususiyatlari tayanishi kerak? Birinchi o'rinda til o'rganuvchilarining ehtiyoji, qiziqishlari, axloqiy-madaniy qarashlari va til bilish darajasini hisobga olish zarur. Taklif etilayotgan matn til o'rganuvchilarida qiziqish hamda kuchli ijobjiy reaksiyani uyg'otishi juda muhim. Yangi, muammoli ma'lumotlarni o'z ichiga olgan, o'zga xalq va millat madaniyatiga olib kiradigan, histuyg'ularni uyg'otadigan matnlar o'quvchilar uchun qiziqarli bo'ladi. Mazmunli va qiziqarli matnlar lingvistik va ekstraliningistik xususiyatlarni tahlil qilish ko'nikmalarini rivojlantiradi. Albatta, taqdim etiladigan matnlar lisoniy jihatdan murakkab bo'lishi tabiiy, shu bois matn tanlashda uning tili sodda, tushunarli bo'lishini hisobga olish kerak.

A.G. Martinez autentik materiallarni qo'llash til o'rganuvchilarida lingvokulturologik bilimlarni shakllantirishiga, real muloqot vaziyatlarida til ko'nikmalarini egallash va rivojlantirishga ko'maklashishiga e'tiborni qaratadi. Autentik materiallarning janr va uslublari xilma-xilligi o'quv faoliyati turlarining variativligini ta'minlaydi, deb hisoblaydi (Martinez, 2000, URL-1). Shu bilan birga, qator xorijiy tadqiqotlarda autentik materiallarning quyidagi asosiy kamchiliklari ko'rsatib o'tilgan.

Autentik matnlarni tushunish jarayoni murakkab kechadi, bu madaniyatlar orasidagi farqlar bilan izohlanadi. Matnda qo'llangan til birliklarining o'quvchining til bilish darajasiga moslashtirilmaganligi, matnda berilgan ma'lumotlarning tez eskirishi materialni sinchiklab tanlash hamda u bilan ishslash jarayonini loyihalashtirishni talab qiladi.

Qator autentik materiallar, jumladan, audio va audiovizual materiallar bilan ishslashni tashkil qilishning qiyinligi bunday materiallarda turli dialektlarning qo'llanishi bilan izohlanadi.

Autentik materiallar bilan ishslash ma'lum darajadagi tayyorgarlikni talab qiladi, bunga esa oddiy o'quv materiallariga nisbatan ko'proq vaqt sarflanadi.

Autentik audioyozuvlarni tinglab tushunishda turli shevalar, mahalliy so‘zlashuv uslubi xususiyatlari, aksent xalaqit berishi mumkin.

Autentik materiallar, xususan, yangiliklar tezda eskirish xususiyatiga ega.

Autentik materialarning yuqorida ko‘rsatib o‘tilgan afzallikkleri va kamchiliklari ularni tanlashda eng samarali tur va shakllarini aniqlash vazifasini qo‘yadi. Masalan, o‘zbek tilini o‘rganuvchilarga biror badiiy asardan parcha yoki gazeta maqolasini o‘qishga beraylik. Bunda, albatta, til bilish darajasi eng muhim mezon bo‘lishi kerak. Ushbu materiallarni til o‘rganuvchilar tushunmasliklari mumkin. Shu bilan birga, juda sodda matnlar ham ularni qoniqtirmaydi. Demak, til ta’limi jarayonlarida ham autentik, ham noautentik matnlar qo‘llanishi maqsadga muvofiq. Eng muhimi – ularning barchasi tushunarli, til bilish darajasiga mos, yozma yoki og‘zaki nutqning jonli modellarini aks ettirishi lozim.

XULOSA

Internet paydo bo‘lishi va taraqqiy etishi bilan o‘qituvchilarning autentik materiallarni topishlari, tanlashlari va ta’lim jarayonida qo‘llashlariga keng imkoniyatlar ochildi. Turli matnlar, gazetalar, jurnallar, to‘g‘ridan-to‘g‘ri uzatiladigan radioeshittirishlar, teleko‘rsatuvarlar, videokliplar va boshqa shu kabi kontent miqdori kundan-kunga ko‘payib bormoqda. Til ta’limiga oid foydali materiallar ro‘yxati ham tobora boyimoqda. Ulardan til o‘rganuvchilar uchun samara beradiganlarini tanlashni to‘g‘ri amalga oshirish ta’limining muvaffaqiyatini belgilaydi. O‘quvchiga Internet havolasini taqdim etib, u yoki bu material bilan shunchaki tamishish vazifasini berish autentik materialning qiymatini tushirib yuboradi. Bu materialga albatta topshiriq ilova qilinishi kerak. Ushbu topshiriq ham real muloqotga qaratilgan bo‘lishi maqsadga muvofiq. To‘g‘ri tanlangan autentik materiallar va ular bilan ishslashga yo‘naltirilgan vazifalar nafaqat tilni o‘rganishga qiziqishni kuchaytiradi, balki kommunikativ va badiiy kompetentlikni rivojlantiradi, til o‘rganuvchilarning lug‘at boyligini oshiradi, ularga til madaniyati haqida ma’lumot beradi, bu esa til ta’limining maqsadlariga erishishga ko‘maklashadi.

O‘zbek tilini xorijiy til sifatida o‘qitishda quyidagi talablarga javob beradigan matnlarni tanlash maqsadga muvofiq:

- o‘zbek tilidagi jonli muloqotdan olingan matnlar;

- dolzARB, ya’ni o‘zbek tilidagi bugungi yuritilayotgan kundalik muloqot namunalarini aks ettiradigan matnlar;
- odatiy, ya’ni standart, muntazam takrorlanadigan muloqot vaziyatlarida qo‘llanadigan nutq namunalari.

Shuningdek, o‘zbek tilida bir-biridan ajralib turadigan shevalarni ham hisobga olish zarur. Jonli tilda shevalarning o‘rni juda katta. O‘zbek tilida jonli muloqotga kirishishga ko‘maklashish uchun til ta’limida, ayniqsa og‘zaki nutqni o‘stirishda O‘zbekistonning muayyan hududida muomalada bo‘lgan asosiy shevalarni nazarda tutish maqsadga muvofiq.

Badiiy matnlardan o‘zbek tili ta’limining dastlabki bosqichida o‘quv mashg‘ulotlarida hamda mustaqil o‘qish uchun qisqa hikoyalar, ertaklar, pyesalar, qo‘shiq matnlaridan foydalanish tavsija qilinadi. Shuningdek, autentik materiallar sirasiga kiradigan audiomatnlar, kliplar, podkastlar, audio formatdagi qo‘shiqlar tilning jozibadorligini his qilishga ko‘maklashadi.

Adabiyotlar

- Абдурахимов, М.М. (2008). *Ўзбекча-русча ва русча-ўзбекча лугат*. Тошкент: “Фан”. 643 б.
- Agzamova, D. (2015). Tarjimashunoslik va lingvomamlakatshunoslik fanlarida realiyalar muammosi // O‘zbekistonda xoiijiy tillar, №3 (7). 119-122.
- Aзимов, Е.Г.; Щукин, А.Н. (1999). *Словарь методических терминов (теория и практика преподавания языков)*. Санкт-Петербург: Златоуст. 472 с.
- Azimova, N. (2010). Uzbek: an elementary textbook. Georgetown University Press. 502 p.
- Влахов, С.И.; Флорин, С.П. (2009). *Непереводимое в переводе*. Москва: «Р. Валент». 360 с.
- Воронина Г.И. (1999). *Организация работы с аутентичными текстами молодежной прессы в старших классах школ с углубленным изучением иностранного языка* // Иностранные языки в школе. №2, 23-25.
- Кричевская, К.С. (1996). *Прагматические материалы, знакомящие учеников с культурой и средой обитания жителей страны изучаемого языка* // Иностранные языки в школе. №1. 13-17.

- Little, D.; Devitt, S.; Singleton, D. (1988). *Authentic Texts in Foreign Language Teaching: Theory and Practice*. Dublin: Authentik.
- Martinez, A.G. (2002). *Authentic Materials: An Overview*. Free Resources for Teachers and Students of English. Karen's Linguistics Issues, 1-7. URL-1: <https://www.scirp.org/%28S%28lz5mqp453edsnp55rrgjet55%29%29/referencereferencespapers.aspx?referenceid=2501731>
- Носонович, Е.В., Мильруд, Р.П. (1999). *Параметры аутентичного учебного текста* // Иностранные языки в школе. № 1. 18-23.
- Перунова, А.В.; Перунов, М.В. (2017). *О некоторых особенностях понятия аутентичные материалы* // Психология, социология и педагогика. №5. URL-2: <https://psychology.snauka.ru/2017/05/8149>
- Русча-ўзбекча лугат* / 2 томли (1983). Тошкент: ЎзСЭБР. Том I. 308 б.
- Sadiqov, Z. (2021). Qadimgi turkiy realiyalar tarjimasi. Monografiya. Namangan: Vodiy media. 120 b.
- Harmer, J. (1998). *How to teach English. An introduction to the practice of English language teaching*. Edinburg: Gate Longman. 198 p.
- Widdowson, H.G. (1990). *Aspects of Language Teaching*. Oxford: Oxford University Press. 213 p.